

Bo tabata sa?

Dia di bestia a pasa caba, y mayoria biaha nos ta pensa solamente riba e bestianan cu nos tin na cas, esta e cachó, pushi, pisca, parha, etc. Cu otro palabra, esnan "dushi". Pero bo a pensa riba esnan cu tambe por ta biba na bo cas, pero cu no ta dushi, ni cariñoso, y ta dolor di cabes di mami y papi?

- E pega-pega ta famia di e lagadishi. Nunca bo ta mira un pega-pega den dia, pasobra e ta un bestia cu ta jaag anochi. Den dia e ta sconde den skref di palo of muraya, riba plafon of tras di cuadranan den cas. Asina cu solo baha y cuminza bira scur nan ta sali.

E pega-pega tin wowonan grandi pa e mira bon. Su curpa tambe ta mas 'plomp' cu e lagadishi. E ténchinan di su patanan ta hanchu y tin un 'cushinchi' bao di nan. Esaki ta haci cu e pega-pega por 'plak' na un muraya, plafon of glas di bentana. E ta come insectonan anochi. Ora e mira un kakalaka, e ta para keto poco leo, y di repente e ta saca un lenga largo manera un zwiep y ta gara e kakalaka. Otro característico di un pega-pega ta cu ora su rabo kibra e ta crece atrobe, esaki ta cu tur reptiel.




- E haraña ta mescos cu un piscadó, e ta span su net pa fango insecto. E cas di un haraña ta trahá di un hilo cu ta pega-pega y e haraña mes ta keda cu e punta di hilo na su curpa pa asina e sinti ora un insecto bin cai den su trampa. E ora ey e ta bai na e insecto y ta span e hilo un par di biaha rond di su victima. E ta chupa tur likido cu tin den e insecto, y lag'é keda cascaso. E haraña ta sera of drecha e buraco cu e insecto a traha den su cas.



- Raton ta un bestia masha "lenig". Su curpa ta chikito y enormemente elastico. E diameter di su cabes ta apenas 2 centimeter. Cu e punta di su boca e ta preta door di un buraco hopi chikito.


Ora cu su cabes a pasa caba, no tin mucho problema mas pa su curpa, ya cu su skeleton ta masha flexible.



Aruba:

antes y awor

San Nicolas



Na 1879, tempo cu Aruba Fosfaat Maatschappij a establece na Aruba, a nace un pueblo na e bahía (baai) na oost di e isla. A bin algun cas y tambe un faro (vuurtoren). Cos tabata bayendo bon te na 1914, tempo cu Aruba Fosfaat Maatschappij a sera porta. Esaki pa via di competencia di e paisnan mas grandi cu tambe a descubri fosfaat y ademas e influencianan negativo di e Prome Guerra Mundial.

For di e tempo ey San Nicolas a bira keto. Pero na 1924, tempo cu Lago Oil & Transport Company tabata preparando pa cuminsa funciona, San Nicolas a bolbe haya bida. A lanta mas vivienda, cobamento di e waf pa preparé pa tanqueronan grandi, a bin un hospital moderno, y varios barionan nobo, p.e.: Lago Heights, Essoville, Lagoville y Colony.

Durante e periodo di 1924 - 1986 cu Lago tabata na Aruba, San Nicolas a conoce hopi progreso. E cantidad di habitantenan a subi di 9.000 pa 54.000. Hendenan di diferente nacionalidad a bin biba aki pa trabao. Den tur skina di e isla busnan di palo tabata corre rond, hibando y treciendo trahadornan di Lago. San Nicolas tabata e "Shopping Center" di Aruba Hopi tienda a lanta den e



Mainstreet y for di tur districto e publico tabata bai haci compras na San Nicolas. Especialme

nte comestibles. Esaki pasobra hopi hende tabata emplean na Lago, y tur empleado tabata haya prijsnan mas ventahoso di Lago Commisary.

Riba e fotonan por mira diferencia di movecion den e Mainstreet, unda cu antes caya tabata yen, y riba e otro foto sacá algun aña atras, e ta poco bashi.

Pero mescos cu den pasado, poco-poco San Nicolas ta percura pa lanta bek. Desde 1990, ora cu Coastal a yega, e habitantenan a haya speransa atrobe Y awor cu Valero a sigui unda Coastal a keda, nos ta spera cu San Nicolas lo haya e movecionnan atrobe di generacionnan nobo cu ta bai goza di e ambiente 'gezellig' cu San Nicolas ta brinda.



Chabalito

Number 7 - Año XII

